



Kamis, 06 Mei 2021

Ogen: Ketangkasan 4:11



"Dibata Ulu Kepentaren"



Kemajuan Teknologi ibas zaman gundari enda, enggo naluken kerja otak manusia. Kai pe nggo banci sidarami bas internet. Perkembangan enda, mabai manusia pe nggo talu iban teknologi. Adi siukuri mbages-mbages, situhuna enda erbanca morah kel ate. Kita selaku tinepa Dibata lanai banci ncidahkan kepentarenta sebab nggo italuken kemajuan teknologi. Ibas perkembangan enda, hal sipenting emekap ula sempat kita nadingken Dibata perban teknologi enda. Uga pa pe perhebatna tinepa manusia arah teknologi enda, ingetlah!, *Ia sinjadikenca kerina si nasa lit, janah erdandanken peratenNa nge maka kerina e lit dinggen nggeluh.* Dibata me ulu kepentaren, sehebat kai pe zaman enda, lalit si banci menandingi kerna pendahin Dibata.

Mari siukurken, doni si tangtangna kosong enda, gundari nggo dem labo enca arah tinepa Dibata tapi tinepa manusia pe banci ngisi doni enda. Ibas kerina si itepaNa e tepana ka kita manusia si banci tading i doni enda si banci ngelakoken kai pe. Apai akapndu si pentarna? manusia ntah Dibata?, tentu jawabenna *Dibata ulu kepentaren.* Kepentaren siidatken manusia situhuna sada pemere Dibata simbelin si jadi pasu-pasu man manusia. Adi bage, banci denga nge katakenndu teknologi si maju bas doni enda pentaren asangken Dibata?

Selain e, Dibata ulu kepentaren eme sada pengertin man banta sincidahken kerna kuasa ras kemuliaan Dibata. Ia ngasup erban kai pe, meteh kai pe si terjadi ras berhak atas kegeluhenta kerina. *"O Tuhan Dibata kami, Kam me si metunggun ngaloken kemuliaan, kehamaten ras kuasa (ayat 11 a).* Ia me uluna, Ia me Dibata. Sekalak bulang si berumur 110 tahun ngerana nina *"Ise pe banci berhak jadi kalak pintar. Tapi, ise pe la banci ngakuken ia pintar seakatan Dibata I surga. Adi lit sekalak jelma ngakuken ia Kalak si pintar, ntah professor pe gia sekali berarti geluhna ganjangan asangken Dibata."* Nggit kam jadi kalak pintar? Labo dalih, tapi arus sibentasi proses kegeluhen lebe. Ibas prosesna e, tetap nge kita terus-menerus erlajar kerna kepintaren.